

江都焦理堂先生年表

戴培之輯

先生姓焦氏，名循，字理堂，一作里堂。世居江都黃珏橋。黃珏橋位白茆湖北，亦稱北湖。其先世自明永樂間聚處於斯，世以忠厚退讓爲法。曾祖源江都縣學生，祖鏡父慈，皆方正有隱德，世傳王氏大名先生之易學。大名先生名方魏，亦居北湖，先生祖母之祖也。遵父命不仕，杜門研易。故先生之祖若父，皆傳其學。先生之深於易理，蓋淵源有自也。（見阮元研經室集通儒焦君傳及先生所撰研考事略）

乾隆二十八年癸未先生一歲。

是年二月三日先生生。乳名橋慶。（見阮傳及先生書徐文號集後文）

乾隆三十年乙酉先生三歲。

先生三四歲，即穎異；嫡母謝孀人撫育之。（見同上文）

乾隆三十三年戊子先生六歲。

是年先生入塾讀書，受業於范秋帆先生。（見先生所撰半九書塾後記）

乾隆三十五年庚寅先生八歲。

是歲先生至公道阮氏家，與賓客辨壁上「馮夷」字。阮公廣堯奇之，遂妻以女。（見阮傳）

乾隆三十九年甲午先生十二歲。

先生十二三歲，好爲小時，父示以詩品曰：「作詩必知詩品，讀詩品又必須知作詩品者之品。」又讀三蘇文，即解爲論序。（見先生刻詩品序，及焦廷琥撰先君事略）

乾隆四十一年丙申先生十四歲。

先生承家學，幼年即好易，是年夏自塾中歸，先生父問日課若何？先生舉小畜彖詞，且陳所聞於師之解，父曰：「然：所謂『密雲不雨自我西郊』者，何以復見於小過之六五？童子宜有會心，其思之也！」先生於是反復其故，不可得。推之同人旅人之號咷，蟲異之先甲後甲，先庚後庚，益憤塞鬱滯於心腹中。（見易通釋自序）此可覘先生幼喜深沉之思，乃能憤啓也。

乾隆四十三年戊戌先生十六歲。

是年習爲詩古文辭。（見雕菰樓集目錄序）

乾隆四十四年己亥先生十七歲。

是年，劉文清公取補學生員，秋應省試。（見阮傳及先生所撰朱文正公神道碑後記）

乾隆四十五年庚子先生十八歲。

是年娶婦。（見先生先妣謝孺人事略）

乾隆四十六年辛丑先生十九歲。

始究毛詩，爾雅。（見先生毛詩鳥獸草木蟲魚釋自序及詩益序）

乾隆四十七年壬寅先生二十歲。

是年先生肄業安定書院。吉謂巖來主講席，先生往謁，吉勉以經學。先生弱冠即好孟子書，立志爲正義，以學他經，輟而不爲。是年子廷琥生。（見焦廷琥先君事略及先生孟子正義卷末）

時安定書院同舍生顧超宗，興化顧文子之子，傳其父之經學。先生亦就文子問難，始專力於經。（見阮傳及羅士琳續疇人傳）

乾隆四十八年癸卯先生二十一歲。

嫡母謝孺人病瘳，旋愈。（見先生先妣謝孺人事略）

乾隆四十九年甲辰先生二十二歲。

甲辰冬謝金圃督學，歲試揚州，重經學。先生得補廩膳生。（見焦廷琥先君事略）

乾隆五十年乙巳先生二十三歲。

是年四月先生父卒，九月嫡母謝孺人亦謝世。多合葬於本宅東數十步。（見先生先妣謝孺人事略）。

先生與顧超宗同食餼，是年皆丁大故。超宗時訪先生於湖中，居半九書塾，抵足夜語，砥礪規正，兩人之交情極篤也。（見先生所撰顧小鳳傳）

是年丁憂，輟舉子業；乃徧求說易諸書閱之。（見先生易通釋自序）

乾隆五十二年丁未先生二十五歲。

授徒城中壽氏之鶴立堂。考釋毛詩地理，並改定毛詩鳥獸草木蟲魚釋。（見先生兩書自序）

是年顧超宗亦在郡城，時相過從，或同牀寢；當月夜煮爰烹茗，輒談論至三鼓。超宗以梅氏叢書贈，曰：「君善苦思，可卒業於是也。」是年爲致力算學之始。（見先生所撰顧小鳳傳及焦廷琥先君事略）

乾隆五十三年戊申先生二十六歲。

仍館壽氏宅。是年顧超宗歿於郡城王思雷家，醫藥棺殯哭泣，王君不以爲忌。王誠長者，然先生實左右之，且多方謀之，

未嘗自言也。（見先生顧小鳳傳及焦廷琥先君事略）先生經學受顧文子影響甚深，而算學之研究，則超宗啓之。故於超宗之死，眷眷不忘；既作招亡友賦，又作詩哭之，蓋情有難已也。

乾隆五十五年庚戌先生二十八歲。

是年先生館於深港下氏宅。嘗撰群經宮室圖五十篇，是多嘔血幾死，遂梓之。先生自謂疏漏所不免也。（見先生江處士手札跋）群經宮室圖二卷，凡九類：曰城、曰宮、曰門、曰屋、曰社稷、曰宗廟、曰明堂、曰壇、曰學、圖所不詳，復爲說附於后。中多創論，與舊說不盡同。當時凌次仲，江良庭皆移書與之爭辯。凌辯路寢，江辯門泉。然許鄭異義，各成其是。則先生之獨據心得，蓋有足多。此爲先生早年刊布之書，其後每遇通人，卽以爲質，而先生之名，亦因而籍甚矣。

乾隆五十六年辛亥先生二十九歲。

館於郡城牛氏宅。（見焦廷琥先君事略）

乾隆五十七年壬子先生三十歲。

館於郡城鄭氏。（見焦廷琥先君事略）鄭柿里篤好韓文，而先生嗜柳州。遂以古文相劇切，思振興之。（見先生所撰鄭舍人文集序）此數年中，先生皆館郡城，得與郡中人士相往還；今可考見者：汪容甫；興化二顧——超宗、仲嘉；汪氏兄弟——晉蕃、掌廷；（見先生所撰汪晉蕃傳）國香山、王東山、（見先生題安定書院壁詩注）黃春谷、李濱石。（見先生所撰兩君詠）……皆績學之士。祇超宗先卒，餘皆時共詩酒，以樂晨夕。後先生出遊魯越，踪跡略疏，然歸則仍聚也。（亦見兩君詠）

乾隆五十八年甲寅先生三十二歲。

先生究心算學，深明其理則，謂九章不能盡加減乘除之用，而加減乘除可以濟九章之窮。是年秋，乃爲加減乘除釋。惟次年卽遊齊魯，其業中輟，至嘉慶二年足成。（見此書自序）此書言理而不言法，與近世混合數學相近，實濫觴之製也。

乾隆五十九年乙卯先生三十三歲。

阮元督學山東，招先生往遊。（見阮傳）正月由東昌至臨清，二月至濟南，遊佛谷龍洞，閏月至青州，三月至登州，登蓬萊閣；四月由萊回濟南，五月歸揚州。（見焦廷琥先君事略）

二月先生在臨清，晤武虛谷。（見先生跋武手札）三月有與孫淵如論考據著作書，謂考據之名不能成立，駁正袁簡齋之說，其時淵如正服官於山東也（見先生與孫書）。四月偕儀徵江安甘泉阮鴻遊登州蓬萊閣，望海。（見先生觀海記）遊齊魯半年，得詩五十首（見先生答羅養齋書）。五月歸揚州（見先生跋卓手札）。熊桂卿邀同人於塔影園爲文酒之會。（見先生詩）

是年秋阮元督學浙江，復招先生。（阮傳謂在次年，實爲此年秋間事）過金陵，晤胡維君。（見先生西魏書論）八月撰釋弧三篇。先生謂梅書撰非一時，繁複無序；戴書務爲簡奧，變易舊名，恆不易了。取二書參之，爲此書。錢大昕爲之序。（見釋弧自序）在浙得益古濱段，測圓海鏡兩書，欣寄李尙之，尙之甚喜，爲之疏通證明（見先生衡齋算學序）。十二月撰乘方釋例五卷（見李儼中國算學史）。先生加減乘除釋卷三曾謂「舊撰乘方通釋以明乘方廉隅之理，與乘方通釋互爲表裡。」蓋即今世所謂二項式定理之初步也。

嘉慶元年丙辰先生三十四歲。

春渡錢塘，由山陰四明至甬東，訪萬氏遺書。撰釋輪二篇；上篇言諸輪之異同，下篇言孤角之變化。時先生子廷琥亦隨遊。六月廷琥患溼幾危，先生送之吳中就醫。因請益於錢辛楣，歸家一月，先生復遊金衢。十二月歸。有游浙詩鈔一卷。（見先生釋輪自序及焦廷琥先君事略）。

嘉慶二年丁巳先生三十五歲。

正月上書王述菴乞爲先人撰文（見先生上王書，王撰墓表載其集中）。是年先生村居訓蒙，雖免跋涉，而家事瑣屑縈心；又有溼熱痔瘡諸疾，殊煩擾懷。以兩事自課，一算法，一刑家之書。（見先生答汪晉蕃書）是歲有以朱陸陽明爲問者，先生作良知論答之（見良知論）。先生雖專攻經訓算數，而宋明理學、亦深造有得，非暖姀自悅者可擬。是年十二月取加減乘除釋舊稿增損之，得八卷，爲定本（見先生自序）。

嘉慶三年戊午先生三十六歲。

家居授徒，無賓客之擾。（見先生修葺通志堂經解後序）秋九月鄉試，落第歸，刪定釋弧舊稿（見釋弧自序）。是年冬，先生集錄柳子厚非國語及其他相類文爲一編。先生又嘗辦正褒姒之事，謂其好語怪異，以惑民志（見先生書非國語後）。識解閎通，蓋非泥古者比矣。

嘉慶四年己未先生三十七歲。

家居授徒，三月刻詩品（見先生刻詩品序）。十一月寫定毛詩鳥獸草木蟲魚釋。蓋自辛丑至己未，十有九年，稿易六次云（見自序）。十二月寫定天元一釋。談階平謂「於正副相消，盈虛相較之理，實能抉其所以然；復能辨別秦氏之立天元一，與李氏迴殊云」（見天元一釋）。

嘉慶五年庚申先生三十八歲。

家居教授。冬應浙撫阮元之招，復遊浙。（見阮傳）寓浙署誠本堂之東偏，吳門李銳與先生同居。銳爲錢竹汀弟字，精天算，與先生有同嗜。先生前既得樂城李氏書，茲復從文瀾閣借得秦氏數學九章中有開方法，先生與銳共論及此，相約廣

爲傳播，俾古學復著於海內。時談階平亦客武林，與先生時相過從，遂撰開方通釋。（見先生所撰誠本堂記，衡齋算學序、開方通釋自序等文）按先生此書，蓋本諸秦氏而闡明之，謂「前人敝精神於開正負帶從諸方，而終未能了；遵古此法，則自一乘以至百千乘，一以貫之。」實則所求者亦僅其近似值而已，非真能爲諸乘方得一通法也。

嘉慶六年辛酉先生三十九歲。

辛酉元旦登吳山第一峯，有詩。（詩載集中）春回揚。送子廷琥至泰州院試。是年弟徵子廷琥皆入學。先生在泰州一月，手錄王曉菴集三冊十四卷。（見焦廷琥先君事略）秋應試、中式鄉魁，座師爲英煦齋。（見阮傳及雕菰樓集序）冬復游浙。（見先生蜀歸裝圖跋）

嘉慶七年壬戌先生四十歲。

是年春北上會試，場中擬元，而榜發仍落第。五月歸里。在京所晤有鄭柿里英煦齋李冠三張開虞王伯申戴金溪朱石君諸人。（見先生壬戌會試記）

五月晦日江文叔邀汪晉藩張開虞等集康山草山。（有詩載集中）

阮元復招先生遊浙，問以古三江之說。阮撰三江考謂班志與鄭注不同。先生則謂鄭氏三江之注，合於班氏。因撰禹貢鄭注釋以答之。（見自序）

是年在杭，嘗與阮元冬日放棹西湖，冒雪敲冰聯句於林處士梅花墓下，感慨嘯歌，莫掩其胸懷高潔之風也。（見雕菰樓集序）

冬還揚州。（見阮傳）

嘉慶八年癸亥先生四十一歲。

先生以母疾，不果出遊，授徒於家。（見先生湖莊圖跋）先是丁未讀王伯厚毛詩地理考，欲更考之；至是十七年未及成書；三月取舊稿刪定之，爲一冊，共四卷云。（見此書自序）

秋八月汪慶人訪先生於北湖，時母疾良已，因命先生設榻留賓，日乘小舟泛於湖東，主客甚樂也。（見先生湖莊圖跋）十一月有與黃春谷論詩書。（見本文）

嘉慶九年甲子先生四十二歲。

是歲授徒家塾，專心研易。以數之比例，求易之比例。向來所疑，漸能理解。初有所得，即就正於高郵王伯申，伯申以爲精銳，鑿破混沌。先生更奮勉，遂成通釋一書。（見先生易通釋自序）此先生易通釋之初稿也。先生著書不自滿假，每有所得，隨時改定；故通釋稿成於此年，而定本則尚在十年後也。

先生嘗以戴東原所撰孟子字義疏證極精善，理道天命性情之名，已揭明如天日，而惜其於孔子一貫仁恕之說，未及暢發，十餘年來每以孔子之言參孔子之言，復以孟子之言佐參，旁及經子，咸通釋十二篇：曰聖、曰大、曰仁、曰一貫忠恕、曰學、曰能、曰權、曰義、曰禮、曰仕、曰君子小人。以示汪孝嬰，孝嬰苦其簡而未備云。（見先生論語通釋及論語補疏兩序）此爲先生義理之學，雖未知孔子之意果如其說否？又較之宋儒，亦未知其孰爲高下，第不失爲一家之言。前人多稱先生易理算術及訓話考證之精，罕有道及此書者，蓋亦當時風氣囿之。居今而欲考究先生之學術思想，則此書實爲先生學術之所寄，未可忽也。

嘉慶十年乙丑先生四十三歲。

歲首有勸先生應禮部試，且資之者。先生以書辭之曰：「生母殷病雖愈，而神未健；此不能北行之苦心，非樂安佚輕仕進也。」（見阮傳）按勸而資之者爲鄭燦庭。見先生答鄭燦庭書。蓋先生母既善病，而先生孺慕之心，老而彌切，且先生亦體弱多病，是以瞻顧鄉閭，不復遠出。此乃先生之衷曲，非肥遯鳴高也。

先生於甲子冬即書肆破書中得一帙，爲雜錄前人論曲論劇之語。先生以其無次序，於乙丑養疴家居，乃爲詮次，參以舊聞，凡論宮調音律者不錄，名之曰劇說。（見先生劇說小序）

先生嘗欲萃鄉先生之文，爲揚州文集；求之不可多得。夏四月得陳靈發何有軒文集，甚喜也。（見先生所撰何有軒文集序）甲子大水，此年水倍於前。家產悉淪，先生之母鬱疾，臥牀百四十日。六月孫蕩，閏月廷琬等大病幾殆。中秋，母病猶未愈。（見先生湖莊圖跋）十月而母竟卒。（見先生答李尙之書二，）上書程易疇，請爲先人作墓誌。（見先生上程書所撰墓銘亦載集中）

嘉慶十一年丙寅先生四十四歲。

先生爲水困授徒郡城，景況殊惡。入秋兼患腹疾，愁鬱，終日，廢書默坐而已。（見先生答李尙之書二，上河水災記上，及天庸庵筆記序等文。）

是年伊墨卿守揚州，阮元亦居憂在籍，相約纂輯揚州圖經，揚州文粹兩書。先生分任其事。明年伊以憂去，阮亦起服入朝，事遂寢。（見先生揚州足徵錄序）

是年阮元爲先生北湖小志作序，稱其有史才。（小志六卷。凡叙六、記十、傳二十一、書事八、家述二；別有圖十、爲卷首。）

嘉慶十二年丁卯先生四十五歲。

先生既撰易通釋。（事在甲子年）是年以質歛縣汪孝嬰、南城王實齋，均許可。然先生自謂以全易衡之，猶未敢信。春三

月遘寒疾，垂絕者七日，昏瞢無知；惟雜卦傳一篇，往復胸中。既甦，更一意於易。（見先生易通釋自序）是年有上郡守伊公書，論圖經義例。

嘉慶十三年戊辰先生四十六歲。

是年服滿，小有足疾，居黃珏橋，閉戶著書。（見阮傳）按是年先生曾以訟事與人對簿，（見易通釋序）惟以何事涉訟，則無可考。

嘉慶十四年己巳先生四十七歲。

是年佐歸安姚秋農，通州白小山修府志，即踵圖經之役也。注易事遂稍輟。（見先生易通釋自序及揚州足徵錄序）六月覆姚秋農書，論修志義例。因修志之餘，整治雜文舊事，次第其目錄一卷，名曰揚州足徵錄，又以隨筆考錄揚事者，成刊記六卷。（見阮傳）修志得脩脯金五百，以小半爲生壙，大半用以葺其老屋，曰半九書塾；復構一樓，曰雕菰樓，有湖光山色之勝，讀書著述，恆在斯樓。足不入城市者十餘年。（見先生半九書塾記及阮傳）

嘉慶十五年庚午先生四十八歲。

是年改訂易通釋，（見自序）輯北湖三家詞鈔。（見焦廷琥白苧草堂記）

嘉慶十六年辛未先生四十九歲。

是年春正月誓於至聖先師，盡屏他務，專理易經；日坐一室，終夜不寢，又易稿者兩度。（見先生易通釋自序及告至聖先師文）

嘉慶十七年壬申先生五十歲。

是年先生撰易學三書，漸有成。三書者，易通釋，易圖略，易章句也。夏月納涼，因與友人縱談王弼易，門人錄之；秋後次爲二卷，即周易補疏也。（見先生周易補疏序）

嘉慶十八年癸酉先生五十一歲。

是年二月，自立一簿，稽考其業，曰注易日記。歷夏迄冬，而通釋成，訂爲二十一卷。皆舉經傳中互相發明者會而通之也。（見易通釋自序）復提其要爲圖略，凡圖五篇，原八篇，發明旁通相錯時行之義；論十篇，破舊說之非；共二十三篇，爲八卷；次通釋後。（見易圖略自序）按易學三書中，惟易章句無序記。餘二書序皆作於此年；其後歷年仍有增損，至嘉慶二十一年，乃有定本。易圖略中有旁通三十證；阮元謂其「尤爲顯據，讀之有聞道之喜。」（見阮元雕菰樓易學序）

嘉慶十九年甲戌先生五十二歲。

先生嘗撰毛詩地理釋、草木鳥獸蟲魚釋、毛鄭異同釋三書，二十餘卷。是年刪併爲一書，即毛詩補疏也。（見先生毛詩補

疏序）易學三書既粗就，不樂閒曠，因取歷年手錄雜文，編次爲道聽錄五十卷。（見里堂道聽錄序）

嘉慶二十一年丙子先生五十四歲。

黃珏橋有明忠臣梁于浹故宅，先生買修之，扁曰：北湖耆舊祠。設木主三十位；祀嘗居北湖，而忠孝行誼載於史志，足爲鄉人表率者；揭其事實於壁，使里人觀感焉。（見阮傳及先生立初狀文）四月成論語補疏。（見論語補疏序）先生以論語、孟子皆所以闡易理。蓋易包天道人事，範圍至廣；論孟所述，自可爲其涵蓋。是年易學三書四十卷成，上書英煦齋，乞爲作序。（見先生上英尚書書）英序作於次年，令刊三書之首。是年多與廷琥纂孟子長編。（見先生孟子正義卷尾注）

嘉慶二十二年丁丑先生五十五歲。

是年正月，自訂雕菰樓集二十四卷，文三百二十六篇，詩四百二十首。（見本集總目跋）自上年先生左臂卽病拘攣，牽掣右臂，不能執筆，心甚怏怏也。（見本集目錄跋）按詩文集雖訂於是年，然今集中有戊寅己卯等年詩文數首，是訂定後仍有增益也。

先生嘗舉國朝人三十二家，作讀書三十二贊；又著貞女論、愚孝論，皆有補於世教。（見阮傳）按此諸文不知何年作，姑繫於編集之年，以明統緒。是年又有與朱椒堂兵部書，及周易用假借論，皆以書數發明易理，皆以見先生著書之宗旨也。是年續纂孟子長編，並成春秋左傳補疏。此書以闢杜說爲主，不徒詳核平詁名物而已。（見春秋左傳補疏）

嘉慶二十三年戊寅先生五十六歲。

是年先生刪定群經補疏成。先生學術以易爲專門，所著三書，皆其獨創。其發於弼義者，則爲周易補疏。關於毛詩者，有地理釋草木疏毛鄭異同釋等篇，刪合爲毛詩補疏。關於書經者，有書義叢鈔四十卷，別據心得者，則爲尚書補疏。關於禮記者，舊有索隱一書，其稿遺失，後復條舉訓詁爲三卷，卽禮記補疏也。左傳論語亦皆有補疏。已見上年。（如群經補疏序，多撰涉此年，故繫於此。）當乾嘉時，漢學正盛，其所持論，一以漢儒爲依皈。先生生當其時，不爲所囿。故疏易則表章王弼，疏論語則發揮義理，疏尚書則稱僞孔有七善，疏毛詩則辨別傳箋之異同，疏左傳則詰駁杜氏之奸佞。皆卓爾不群，陳義洽當。矯時不惑，先生有焉。

先生注易之餘，別撰易話二卷，易廣記三卷。易話載友朋及門弟子說易之語，易廣記採錄前人易注之善者。（易話易廣記兩書序皆此年作，因繫於此。）

先生既輯孟子長編，將纂正義，恐志有懈弛，立簿逐日稽省，如前此之注易。是年十二月初七日，開撰孟子正義。（見先生纂孟子正義日課記）

嘉慶二十四年己卯先生五十七歲。

纂孟子正義，兼訂諸舊稿，足疾時作。（見先生纂孟日記）

嘉慶二十五年庚辰先生五十八歲。

纂孟子正義，並刪訂諸舊稿，足疾時作。夏足疾甚，且病瘧。七月二十七日卒。（見阮傳及先生纂孟日記）按日記終於是年七月初八日，距卒僅十九日；或絕筆於此，未可知也。（先生病狀，詳焦廷琥先君事略）。

孟子正義垂成而先生歿，僅存初稿。至道光乙酉，其弟徵校而梓之，并爲叙略。（見孟子正義焦徵跋）

先生自癸亥家居，至庚辰十八年中，著書將三百卷，成不朽之業，而心血實耗於此矣。（見焦廷琥先君事略）

先生子廷琥，字虎玉，能讀書，傳父學。阮元稱其端士。著有密梅花館詩文錄二卷。先生卒後一年，廷琥亦哀毀死。

民國八年，余治學揚州，從江子雲桂爵丞諸先生遊，於揚之先正，翕然嚮往。每及里堂先生，江師輒多陳述，其遺著亦多度阮氏書塾，乃得概覽。明年淮陰范冠東先生蒞揚，對焦先生亦備致鄉慕者，暇輒商集焦先生行誼，次爲年表，范亦嘗爲文考其版本，縷述至贍。迨去揚，原稿慎緘行篋，竊擬有機當另爲年譜。卅載以來，僕僕塵俗，所志迄未能達。入臺以後，偶檢舊篋，而故稿仍在，意者文字因緣，或亦三生所不爽乎！乃予以揭篋云。

四十五年冬戴培之敬誌